

INUIT ATAQATIGIIT

Inatsisartuni



UKA 2017/7
Nuuk, 25-09-2017
Kelly Berthelsen

2018-imut aningaasanut inatsisissatut siunnersuut

(Aningaasaqarnermut naalakkersuisoq)

Aningaasanut inatsisissatut siunnersuut inuaqatigiinnut pitsangoriaatinik ikigisassaangitsumik nassataqartoq qujassutigaarpot. Qujassutigaarpullu pisuussutitta pingaarnersaasa – tassa inuit – pitsaanerusumik atugaqalernissaannut Naalakkersuisooqatigiit piffissakikkaluqaqlutik pingaarutilinnik alloriarsinnaasimammata.

Inuit atugaannik pitsangorsaaniarnermi Naalakkersuisunit aningaasanut inatsisikkut iliuuserineqartussat ilaqtigut makku iluarismaratsigit oqaatigissavarput:

Ineqarnermut tapit eqaannerulersussanngorput. Siusinnerusukkut killigititaq 1 kr.-imilluunniit sipporaanni taava tapit atorunnaartalaraluartut massakkut isertitat amerliartornerat malillugu ikiliartortussanngorput taamalu akunnattumik isertitalinnut iluaqutaasussaassallutik. Nammainerisamik angerlarsimaffeqarnerup pingaaruteqarluinnarnera eqqarsaatigalugu iliuuserineqartoq inuaqatigiinnut siuariaataassaaq annertoq.

Aamma meeqqanut tapit assingusumik aaqqissuussivigneqassammata akunnattumik isertitallit killigititamik qaangiillatsiartut ajornartorsiortitaasarnerat atorunnaassammat assorsuaq Inuit Ataqatigiiniit nuannaarutigaarpot.

Inunnut aningaasaliineq siunissamut aningaasaliineruvoq. Meerartavut inuussuttavullu maanna ikiorutsigit erniinaralaq pissarsiassavut katarsorumaarpavut. Aaqqissuussinerit taakku inuit ataasiakkat aningaasanik atugassaqarnerulererannik nassataqassammata inuit ataasiakkat aningaasatigut atugassaqarneruliinnassanngillat inuaqatigiinnili aningaasat kaaviliarnerat sukkanerulissalluni taamalu aningaasarsiornermut iluaqutaassalluni.

Takornariartitsineq siunissami inuussutissarsiutissatut pingaaruteqalersussaavoq. Pinngortitamik annerusumik innarlinngikkaluarlugu takornariartitsinikkut annerusumik iluaqutigisinnaavarput. Takornariagassat qanorluunniit alutornartigagaluarunik pisariitsumik tikinneqarsinnaanngikkunik iluaqutigineqarnavianngimmata tamatumunnga sillimmartaarluni mittarfiit Kalaallit Airport A/S aqqutigalugu piareersarneqalernerat nuannaarutigaarpot. Nunallit immikkoortui allat aamma puigoqqunngeqaavut taamaammallu mittarfiit minnerusut ukiuni missingersuusiorfiugallartuni sukumiinerusumik aningaasartalerneqarnissaat matumuuna noqqaassutigissavarput

Ukiuni kingullerni kinguaassiutitigut atornerlugaasimasut suliniuteqarfingineqarnerat iluaqtaalersimaqaaq, taamaattorli siusissukkut iliuuseqarneq aamma aallunnerusariaqarparput. Neriuppugut meeqqat kinguaassiutitigut atornerlugaasimasut siusinaartumik ikorneqarnerannut aningaasanik nassaartoqarsinnaajumaartoq.

Inuaqatigiinni atukkat oqimaatsut pissutigalugit angerlarsimaffeqanngitsut amerliartorput. Atugarissaqqilernissaannut suliniutit suugaluarpatluunniit angerlarsimafik tamatigut siulliussaaq. Taamaammat anisitaasartut ikinnerpaalersinniarlugit siunnersuisarnerit

aallunneqassasut noqqaassutigissavarput kiisalu angerlarsimaffeqanngitsut immaqa ilaatigut najugaqatigiiffinnik pilersitsinakkut ikiorniarneqarnissaat misissoqqussallutigut. Ilaatigut Majoriamut aningaasaliissutit amerlineqarneratigut inuusuttut ilinniaqqinnissamut piareersarneqarnerat annerusoq nuannaarutigaarpot. Kisianni ajornartorsiut sorlaaniit aaqqitassaammat meeqqat atuarfiat eqqarsaatigalugu makku oqaatigerusuppavut: Atuarfiatsialak kulturerput aallaavigalugu atuartitsivinnortinniarlugu aaqqissugaavoq. Aap, tamanna ajunngilluinnarpoq pisariaqarluilu. Kisianni, inuiaqatigiinni atukkat oqimaatsut, pissakilliorneq, kinguaassiutitigut atornerluineq, aanngajaarniutnik atornerluineq, atuarfiup atuartitsinerullu aaqqissugaanerani ilanggullugit sillimaffiginnngikkutsigit meeqqat atuarfianni soraarummiinngitsoortartut ikilisinnaviaangilavut. Tamatumunnga ilanggullugu ilinniartitsisungornianik ilinniartitsinermi ajornartorsiutit tamakku sillimmartaarfingeqartarnissaat kissaatigaarpot.

Pingaarterpaalli ilaattut una oqaatigerusupparput: Qanorluunniit piumasaqartigigaluarutta aningaasaqarnikkut immitsinnut artukkissanngilagut. Inuit isumagisassavut ameriartortussaammata sulisinnaasullu ikiliartortussaammata siunissamut sillimasariaqaratta missingersuusiornermi annerusumik amigartooruteqannginnissarput piumasarissavarput.

Uagulli Inuit Ataqatigiinniit aningaasanut inatsimmut ataasiinnarmut isigineq pinnagu siunissaq ungasinnerusoq isigalugu inuiaqatigiinni allannguutissanik pingaarutilinnik nassataqartussanik makkuninnga saqqummiussaqarumavugut.

Pisuussutivut tamattaalluta pigaavut

Inuit Ataqatigiinniit quleqtsiusarput taanna ima ilanggitsoorsinnaanngilarput: Pisuussutivut tamattaalluta pigaavut – pisuussutili pingaarnersaat tassaapput inuit. Taamaammat oqaatsit taakku eqqarsaatitsinniitillugit 2018-mut Aningaasanut Inatsisissatut Naalakkersuisooqatigiit siunnersuataat oqaaseqarfigissavarput.

Naligiinneq annerusoq

Ilisimaneqartutut Inuit Ataqatigiinniit naligiinneq annerusoq tamatigut anguniartuarparput. Angutit arnat, inuiaat assigiinngitsut, inuusuttut utoqqaallu, nunaqarfimmuit illoqarfimmillu suullu assigiinngitsut tamatigut naligiinnerulernissaat ilungersuutigiuarpalput. Minnerunngitsumilli pissaqassutsikkut inuiaqatigiit naligiinnerulernissarput qangali anguniagaraarpot.

Qularnanngitsumik ilaat aperiumassapput: Naligiinneq sooq tannarineqartuassava uffa inuit tamatta assigiinngitsuusugut?

Siullermik, inuit tamarmik inatsisitigut naligiittussaapput, arlaannarpulluunniit pingaarterutinnejassanngilaq. Taamaammat pisuussutit inuiaqatigiit tamarmik pigisaasa agguataarneqarneranni inuiaqatigiit tamarmik naligimmiik pineqarnissaat pingaartilluinnarparput.

Aappassaannik, immaqalu suli pingaarterusumik: Inuiaqatigiinni kikkulluunniit tamarmik atorfissaqartinnejqarput, pingaartumik inuiaqatigiinni uatsitut ikittuinnaasuni taamaappoq. Nukiit tamarmik meerartatta utoqqartattalu aammalu napparsimasortatta innarluutilittattalu isumagineqarneranni pisariaqartinnejqarput. Aamma, inuiaqatigiit pissaqartinniarlugit inuussutissarsiornermi kikkut piginnaaneqarunnartut tamarmik pisariaqartinnejqarput.

Pingajussaannillu, pisuussutivut siammarsimammata siammarluta inuugatta sumiiffimmuit sumiiffimmuit assigiinnerusunik atugaqartariaqarpugut taamaattoqanngippat inuiattut ataasisutut misigineq ajornakusuussammat taamalu nammaqatigiinneq ajornakusuussammat. Tamanna pillugu nunap immikkoortuini naligiinneq annerusoq pillugu saqqummiussaqassaagut.

Naligiinneq annerusoq eqqarsaatigalugu Naalakkersuisooqatigiit aningaasanut inatsisissatut siunnersuutimminni meeqqanut ineqarnermullu tapinik pitsangorsaaniarnerat assorsuaq qujarupparput quleqtsiusarpummi eqqorluinnarlugu meerartavut tassaammata pisuussutitta annersaat taamaammallu sapinngisamik pitsaasunik atugaqartinnejqartussat.

Ineqarneq eqqarsaatigalugu Inuit Ataqatigiinniit Naalakkersuisunut aamma kajumissaarutigiumavarput ineqarnermut inatsisit siunissami misissuataarluaqqullugit.

Ullumikkummi ineqarnikkut immikkoortortat imminnut napatittussanngorsimanerat pissutigalugu nunap immikkoortuini aningasarsiornikkut ajornartorsiorfiusuni ineqarnermut akiliisinhaaneq ajornartorsiutaagaangat akiliisartutuannguit annertuumik nammakkerneqartarput. Taamaammat ineqarnermut tapitigut qanoq iliuuseqarniarneq iluarisimaalarluarlugu ineqarnermut tunngasut piffissami qanittumi isumaliutigeqqinnejarnissaat kajumissaarutigeriissavarput.

Pisuussutit tamatta pigaavut

Naligiinneq annerusoq eqqartortillugu aamma nunatta pisuussutaasa tamatsinnit pigineqarnerat erseqqissartuarusupparput. Kikkut tamarmik aalisartuusinnaanngillat aatsitassarsiortuusinnaanatillu, taamaattumik aningasarsiornikkut sakkussavut soorlu akitsuutit atorlugit pisuussutit kikkunnit tamanit iluaqtigineqarnissaannik Naalakkersuisut qularnaariniarnerat qujarupparput.

Tassungaannarli killeqartariaqanngilaq! Paasinarsippat pisuussutitta tamatta pigisatta iluaqtigineqarnerat inunnut ikittuinnarnut eqiterneqalersimasoq, taava uagut Inatsisartut Naalakkersuisullu inuiaqatigiit pigisaannik pitsaasumik nakkutiginnissalluta pisussaaffiligaasimasugut agguassinerup naligiinnerusunngortinnissaannik pisussaaffeqarpugut. Pisuussutit, aalisagaappata aatsitassaagaluarpataluunniit, naligiinnerusumik iluaqtigineqalernissaannut Inatsisartut Naalakkersuisullu sapiissuseqarnissaannik matumuunna kissaappavut, aammalu inatsisisstatut siunnersuutaajunnartut tamatuminnga siunertallit tamaasa tapersorsorumaaratsigit inuiaqatigiinnut neriorsuutigissavarput.

Kikkut tamarmik atorfissaqartinneqarput

Siuliani oqareerpugut kikkut tamarmik atorfissaqartinneqartut, aamma kikkut aanngajaarniutinik atuinermiit eqqugaasimagaluit nukissaqaqqilerlutik tamakkiisumik sulileqqissinnaasut atorfissaqartippavut. Maannamut misilitakkat pitsasut takutereerpaat atornerluisimagaluit ikorneqaraangamik imminnut inuiaqatigiinnullu nukissanik annertuumik tunisisartut.

Inuiaqatigiittut qangarsuarli nassuerutigaarput aanngajaarniutinik atornerluineq ajornartorsiutigipput. Maanna ajornartorsiut eqqartorunnaarlugu, eqqartulerniartigu qanoq ililluta anigussaneripput. Taamaammat imigassaq pillugu inatsisiornissamut, taamalu timitalimmik oqallinnissamut, Naalakkersuisut ammaassinerat qujarupparput, Inuit Ataqatigiinniillu qulareqqussanngilarput quelequettami tessani pingaartitatsinni pisarnitsitut ammasumik peqataajumaaratta kikkut pisariaqarunnartut tamaasa peqatigalugit.

Piffiit naligiinnerusut

Pisuussutivut siammarsimammata siammarluta inuuvgugut. Pisuussutit sumiikkaluit iluaqtiginiartariaqarpavut, avinngarusimasumiikkaluarpataluunniit. Tamanna pillugu avinngarusimasuni najugaqarnissaq inunnut artukkissanngilaq atukkallu assigiinngippallaalissanatik sumiiffiup avinngarusimanera piinnarlugu.

Tamanna pimoorukkumallugu Inuit Ataqatigiinniit ilungersorluta makku isumaliutissatut kissaatigissavavut piaartumillu anguarniarneqarnissaat ilungersutigiumaarlugu: Inuiaqatigiit ataasiuvugut, sumi nunassinnerput apeqquaatinngu akileraarutivut assigiilerniarlik, aammalu inuuniarnikkut aningasartuutinut pisariaqarnerpaanut, imermut, kiassnermut, innaallagissamullu aningasartuutivut assigiilerniarlik. Aatsaat taamaalilluta pisuussutivut siammasissut, aalisakkat aatsitassat, takornariagassaqqissullu sumiikkaluarpataluunniit inunnut artukkersuutaanngitsumik iluaqtigisinnanngorumaaarpavut.

Tamatuma saniatigut meeqqat atuarfiisa pitsasusiinut kommunit qanoq pissarissaartiginerat apeqquaasariaqanngitsoq isumaqarpugut. Meerartavut sumiluunniit najugaqaraluarunik assigiimmik atuartitaanikkut periarfissinneqartariaqarput. Taamaammat Inuit Ataqatigiinniit siunnersuutigissavarput meeqqat atuarfii pisariaqartitsiviusut toqqaannartumik nunatta karsianiit aningasalersorneqarnissaannut periarfissiisoqassasoq.

Angallanneq eqqarsaatigalugu piffinnittaqaq naligiisitsinerujumalluta assersuutigalugu sinersortaatit annerusut Nanortalimmut apuuttalernissaat kissaatigaarput. Taqqannami aamma takornariarfissuanngoreerpoq angallannikkut periarfissiinikkut suli annerusumik iluaqutaalersussamik.

Sulinermut ilanngaat

Inuit ilaat ineqarnermut assigisaannullu akiliigaangamik imminnut nunguutingajalluinnartarpus, naammattusaariuartariaqartarlutillu. Inuilli ilaat akiligassanut akilereeraangamik annerujussuarmik sipporussaqartarpus. Tupinnanngitsumik ikigisassaajunnaartut naammattusaariunermut nukissaaruttarpus pisortaniillu ikiorneqarlutik inuunissartik ajornannginnerusutut isigilersarlugu. Imminut ataaqqineq, maligassiuineq, allallu taamaalillutik amerlaqisunit annaaneqartarpus. Kikkut tamarmik atorfissaqartinneqarmata taakku nukii aamma atorfissaqartinneqarpus, qularnanngilarlu periarfissinneqarunik suleqataajumassaqisut.

Qujanartumik allanngortinnissaanut periarfissaqarpugut piumagutta sapiissuseqaruttal angusinnaasatsinnik. Tassami sulinermut ilanngaat akissaatikinnerusunut qaffanneqarsinnaavoq taamalu pisortanit ikorsiissutinik toqqaasarnermut taarsiullugu inuit sulumasut annerusumik imminnut napatissinnaangornissaannut periarfississavavut.

Qularutiginngilarput taama inuit sulinermut ilanngaasiinikut inuiaqatigiinnut tunniussaqaqataanissaannik periarfissinneqarnerannut inuiaqatigiinni pissarissaarnerpaat akileeqataajumassasut. Sulinermut ilanngaat pissarissaarnerpaanit nammaqataaffigineqarpas nammaqatigiinnertut isigalugu iluarissavarput.

Qularutiginngilarput taama inuit sulinermut ilanngaasiinikut inuiaqatigiinnut tunniussaqaqataanissaannik periarfissinneqarnerannut inuiaqatigiinni pissarissaarnerpaat akileeqataajumassasut. Sulinermut ilanngaat pissarissaarnerpaanit nammaqataaffigineqarpas nammaqatigiinnertut isigalugu iluarissavarput.

Nukippasuit pissarsiarinissaannut piumassuserput sapiissuserpullu kisimik apeqquataalerput.

Kulturi nukittoqtitut nappatitullu

Kulturi kulturikkullu suliniutit aliikkutassiaannaannigillat! Inuaat kinaassusiannik ersersitsisuupput, inuiaqatigiinni inunnili ataasiakkaani nukittoqtaapput, minnerunngitsumillu soorlu takornariartitsineq eqqarsaatigalugu napaniarnitsinnut ilapittutaarujuussuassapput.

Taamaammat Inuit Ataqatigiinnit pinngitsoorumanngilagut kulturikkut suliniutit pingaaruteqarluinnartutut isigalugit tapersorneqarnissaannut kaammattuissalluta.

Aningaasanut Inatsisikkut makku annerusumik tapersersugassatut taarusuppavut: Isiginnaartitsineq, tassa nunarpus ataatsimut isigalugu aammali piffinni ataasiakkaani isiginnaartitsisartoqarneq annerusumik tapersersortariaqarpas. Isiginnaartitsineq aliikkutassiaanaannigilaq, inuianili anersaakkut nukitorsarfittut minnerunngitsumillu siammassisumik isummersornermut aammalu inuaat imminnut ilisariniarlutik tarrorsorfiattut isigalutigu tapersersugassatut isigaarput. Aamma filmilioorneq taama pingartitsigatsigu tapersersoqqarput.

Kulturikkut illorsuit sutigut tamatigut inuiaqatigiit ataatsimoorfiisut atorfissaqarpus. Taamaattumik illoqarfinnut mikigaluanulluunniit allaat kulturikkut illoqarnissaannut tapersersuinissamut kajumissaarivugut, Naalakkersuisunut Inatsisartunullu.

Timersorneq timikkut peqqissaataaginnarani aamma inuiattut avammut attaveqaataavoq pingaarutilik, taamaammat najukkani ataasiakkaani pingartumillu nunanut allanut timersoriarnissamut tapiissutit isumaginninnermi iliuuserineqartutulli pingartinneqartigisariaqarpus pitsaliunermi sakkussaagamik naliitsut.

Atuakkiorneq aamma tassaavoq inuaat isaat qarngallu. Isigisanik, isigisariaqavissunik, oqaatigisariaqavissunillu saqqummiiviusarpoq. Inuaat atuakkiornikkut pisuunngorsarumallugit pikkorissaanernut, saqqummersitsisarnernut allanullu atugassanik naleqquutunik aningaasaliisoqarnissaa ilungersorluta noqqaassutigaarput.

Aatsitassarsiorneq

Aatsitassarsiorneq inuiaqatigiit sinnerisulli isumalluarfigigatsigu, naatsorsuutigigatsigulu ukiuni aggersuni aatsitassarsiorfik ataasiinaanngitsoq ammarumaartoq, naalakkersuisut kajumissaarumavavut pissarsiat pitsaanerpaamik agguanneqarnissaannut aqqutissiuqquallugit.

Suleqataaneq pissarseqataanermut aqqutissat pingarnersaraat, taamaammat nunaqvavut suleqataassapput suliffeqarfiillu nunaqvavut pigisaat sapinngisamik annerpaamik atorneqassallutik. Taakkununngi ilinniartitsinerit aamma kipputissanngilavut.

Suliffissat aningaasallu pisariaqartikkaluaqigivut taamaattoq inuiaagatta ikittuinnaat mianersorfissaqarpugut: Aatsitassarsiorfiit amerlavallaat angivallaallu ataatsikkut

aallartikkaluarutsigit inuiaqatigiit sinnerini sulisussaalatsineq – maanna ilaatigut aallartereersoq – annertuumik ajornartorsiutaalersinnaavoq aammalu akissarsiatigut annertuumik equngasitsilersinnaalluni. Assersuutigalugu pisortat akissarsiatigut unammisinnaanngippata isumaginninnermi sulisussaalatsisoqalersinnaavoq sulisuugaluillu akissarsiaat assorsuaq nalikillisinnaallutik.

Aatsitassarsiornerup ilorraap tungaanut aallarnera attatiinnarumallugu kissaatigaarpot nunani tamalaaneersunit inuttaqartumik aatsitassarsiorneq pillugu siunnersuisoqatigiinnik pilersitsinissaq Aningaasanut Inatsisissamut 2018-imoortumut aningaasalerneqassasoq. Tamanna Naalakkersuisooqatigiit isumaqatigiissutaani angusassatut aamma siunnerfiuvoq.

Naalakkersuisooqatigiit isumaqatigiissutaani ima allassimavoq:
“Nunani tamalaaneersunit inuttaqartumik aatsitassarsiorneq pillugu siunnersuisoqatigiinnik Naalakkersuisooqatigiit pilersitsinissaq suliarissallugu isumaqatigiissutigaat.”

Tassunga ilanggullugu aamma apeqqutigerusupparput Alcoa suniarnerippot, takusinnaasavummi malillugit suli aningaasanut inatsisikkut aningaasartorfigineqarmat kisiannili sunik kinguneqarneranik takussutissartaqanngitsumik.

Pinngortitaq piujuartitsinerlu

Pinngortitaq pinngorfigaarpot, pissarsiorfigaarpot taannaqanngippallu piunaviangnilagut. Tassa pinngortitaq tamatta paarilluagassaraarpot. Avataaniit mingutsitsineq eqqumaffigiuarluarippot taamaattoq uagut nammineq pingaartumik eqqagassalerinermi kinguartooqqanerput aamma siunissami qanittumi Naalakkersuisunut eqqumaffigeqqussavarput.

Pinngortitap pisuussutai inuiattut nappatigaavut, sapinngisamik annerpaamik pissarsivigerusuttarpavut. Mianersuaalliussanngilagulli, immitsinnut kinguaassatsinnullu nunguutsissanngilagut. Pisuussutivut isumatuumik mianersorluta atussavavut, ilisimasat pissarsiarisinnaasavut tamaasa atorlugit.

Namminersorneq

Inuiattut namminersorumavugut, tamatumungami piareersalereerpugut, siunnersuutivullu siulianiittut tamarmik tassunga sammipput. Naalagaaffiugutta naalagaaffiunngikkuttaluunniit inuiattut namminersorumavugut. Ataaserlu paatsooqquungeqaarpot: Namminersortunngorneq suaarutaassanngilaq imaqanngitsoq, piginnaanerussaarli inuiannit amerlanernit pigineqalersimasoq. Inuiaat peqqillutik piginnaaneqarlutillu, pisuussutiminnillu tamanik piginnittungorsimallutik namminersortunngussapput.

Siunnersuutit taasavut atorlugit inuit pisortanik isumalluuteqarnermiit ikaarsaartissavavut ilaatigut sulinermut ilanngaat atorlugu, aanngajaarniutinik atuinerup akiornateratigut, kulturikkut nukittorsarnitsigut kulturimillu iluaquteqalernitsigut.

Pingaartumik inuussutissarsiornikkut namminersorsinnaassuserput anguniarlugu ukiut tamaasa aningaasanut inatsisikkut allorartuassaagut.

Aalisarneq, tamatigut nunaqvissunut annerpaamik pissarsiaqarfiusunngortinniarlugu sulissaagut. Pisuussut qaqinneqarfimmini annerpaamik sulisoqarnikkut akileraartarnikkullu iluaqtigineqassaaq.

Aatsitassarsiorneq kinguaassanit aamma pissarsiaqarfiussaaq, sunillu iluaqtissanik aalaakaasunik pissarsiniarfiussalluni.

Takornariartitsinikkut nunarput alutornartorsuaq iluaqtississarsippat takornariagassat suusut tamatta ilisimassavavut, sullisisinnaassalluta, takornariagassallu sapinngisamik pisariinnerpaamik tikinnejarsinnaassapput. Tamakku tamaasa naligiilluta ataatsimoorlatalu pissarsivigissavavut pinngortitarput ataqqillugu.

Sulisussat, tassa inuit, tassaapput pisuussutitta pingaarnersaat, ilinniartitsinikkut, peqqissutsikkut inuunermlu toqqisisimannikkut aammalu kulturikkut ataatsimoorfeqarneq atorlugu pitsaasunik atugassaqartissavavut.

Qujanaq